

# LUKA 5: 3 THIRRJET E JEZUSIT NË JETËT TONA

Nga TODD MORR



[WWW.MISSIONALMADESIMPLE.COM](http://WWW.MISSIONALMADESIMPLE.COM)

## LUKA 5: 3 THIRRJET E JEZUSIT NË JETËT TONA

Luka 5 është bërë një nga pasazhet më të parapëlqyera për mua që vitin e shkuar. Këtë pasazh e përdor shpesh kur trajnoj kisha rreth përparësisë për ta jetuar jetën si një familje dishepujsh dhe për të qenë një familje dishepujsh, qëllimi kryesor i së cilës është "peshkimi" së bashku i burrave dhe grave.

### JETA ME JEZUSIN NË QENDËR

Ky vizion përcillet nga Jezusi përgjatë Lukës 5 përmes, asaj që e shoh si 3 thirrjet domethënëse të Krishtit në jetët tona, si dishepujt e Tij. Jezusi e nis kapitullin duke bërë një mrekulli të jashtëzakonshme për të përforcuar autoritetin e tij, dhe e bëri këtë në një mënyrë që do t'i prekte thellë zemrat e këtyre burrave. Ai i ndihmoi këta peshkatarë me përvojë të kapnin rrjetën me të madhe me peshq, që kishin parë ndonjëherë, pikërisht kur kishin kaluar gjithë natën pa kapur asnjë peshk!

Pas kësaj, ne shohim thirrjen e parë të Jezusit, sipas së cilës ata duhej t'i hidhnin rrjetat në ujë; të linin mënjanë profesionin e tyre, familjet e tyre, **të hiqnin dorë nga gjithçka e rëndësishme dhe ta bënë Atë qendrën e jetëve të tyre.** E njëjta thirrje është për ne, që të heqim dorë nga "rrjetat tona" dhe ta ndjekim Atë, duke e bërë qendrën e jetëve tona.

### JETA NË KOMUNITET SI NJË FAMILJE

Thirrja tjetër nuk është kaq e drejtpërdrejtë, por besoj se është qartësisht e marrë me mend nga këta burra, ashtu siç duhet të jetë edhe për ne. **Jezusi nuk i thirri ta ndiqnin individualisht, por si një komunitet, që do të jetonte si familje.** Ai do të ishte rabini i tyre, mësuesi i tyre, ashtu siç e quajnë ata më vonë, ndërsa ata do të ishin komuniteti i Tij i dishepujve. Ata do ta ndiqnin së bashku dhe do të mësonin të ecnin në rrugët e Tij bashkërisht. Thirrja e dytë e Jezusit në jetët tona është të jetojmë në komunitet si familje, me Atë në qendër. Të ndjekësh Jezusin është një thirrje e përbashkët, si një familje. Nuk është së pari individuale, e izoluar dhe vetjake.

### JETA SI NJË FAMILJE NË MISION PESHKIMI TË NJERËZVE

Së fundmi, ne shohim thirrjen e tretë domethënëse të Jezusit të shpallur qartë në vargun 10. Jezusi jo vetëm që i thërret dishepujt e parë të jetojnë në komunitet si familje, një familje me Atë në qendër, por edhe si një familje, që do të punojë së bashku në misionin e peshkimit të njerëzve. Jezusi e bën të qartë në vargun 10 që qëllimi i jetës është të ndjekësh atë. **Ju do të bëheni peshkatarë njerëzish dhe ne do të peshkojmë së bashku! Ne do të bëhemi një familje peshkatarësh, që punojnë së bashku për të bërë dishepuj mes të humburve dhe të dërrmuarve shpirtërisht.**

Kjo thirrje e tretë nuk ka ndryshuar për ne. Si dishepuj të Jezusit, ai ka të njëjtin vizion për ne, të njëjtat pritshmëri ndaj nesh dhe të njëjtën thirrje në jetët tona. Ai dëshiron që ne ta jetojmë jetën me Të në qendër, të jetojmë si familje me dishepujt e tjerë dhe të punojmë së bashku si familje peshkatarësh, që bëjnë dishepuj mes njerëzve të humbur dhe larg nga Zoti.



## T'I PËRJETOSH TË TRIJA THIRRJET

Pas këtyre tri thirrjeve nga Jezusi, gëzohem teksa shoh atë, që ndodh në vargun 11. Jezusi dhe dishepujt nuk tërhiqen mënjanë e të nisin një proces formal trajnimi 6 deri në 12-mujor. Ata nisen menjëherë drejt fshatit më të afërt për të filluar së bashku peshkimin e njerëzve! Menjëherë!

**Jezusi i merr menjëherë në mision për ta jetuar jetën duke ndjekur Atë dhe duke ndikuar njerëzit me lajmin e mirë të Mbretërisë.**

Jezusi u tregon se si të duan, të kujdesen dhe të luten për të sëmurët, si të bisedojnë me ata, që kanë pyetje, por që edhe i kundërshtojnë, si të pushojnë dhe të kërkojnë ndihmën e Atit përmes lutjes, sikurse edhe si të arrijmë njerëz si Levi dhe miqtë e tij tagrambledhës, të cilët konsideroheshin si më të këqijtë e të këqijve. Ai u tregon se si ta bëjnë këtë së bashku si komunitet i dishepujve! Si përfundim, Jezusi u rikujton Farisenjve se për çfarë është Ai dhe dishepujt e tij atje dhe cili është qëllimi i tyre përfundimtar: t'u sjellin shërim të sëmurëve dhe mëkatarëve. Njerëzit e shëndetshëm nuk kanë nevojë për mjek. Të sëmurët kanë nevojë për mjek! Jezusi na thërret sot ne dhe kishat tona për të njëjtat 3 përparësi!

